

QUÆSTIO MEDICA.

QUOD LIBET ARIIS DISPUTATIONIBUS

manè discutienda in Scholis Medicorum die Iovis

octavâ Februarii 1685.

M. NICOLAO BAILLY;

Doctore Medico, Præside.

An ex insomniis temperamenti cognitio?

TEMPERAMENTI nomen celeberrimum nomen est. Hoc assiduò recinunt pueri, senesque; hoc omnium sermone teritur. Temperamenti laus magna sive apud ægrotantes, sive apud medentes. Hujus Medici peritiæ, curæque multò jucundiùs committere se solent ægri, cui jam aliundè suam innotuisse temperiem putant. Ipse Medicus eos à se commodiùs curandos gloriatur, quorum temperies sibi jam antè fuerit explorata. Hinc rerum Domini Medicos magnis invitant præmiis, ut uni suæ temperiei studeant, hanc vigiles diu noctuque meditentur; hinc Medici seniores ab omnibus petuntur & expetuntur, dum juvenes frigent, quod senum in æstimandâ temperie major industria esse perhibeatur. Clavem itaque iis esse præ manibus jure credas, cujus operâ pateat aditus ad imos secessus corporum, quibus feliciùs & faciliùs nota cujusque hominis temperies. Hujus profectò temperiei magna vis, & potentia superior cæli & astrorum impressionibus. Hæc naturæ præcipuum ad omnia munia instrumentum non immeritò prædicatur. Eapropter à temperie esse conquerruntur improbi, quod turpi inhient lucro, quod omni deposito pudore stuprum virginibus inferant, quod sacris non parcant, quod templa deorum, civium domos iniquè compilent.

A

I

Sicut è contrà iidem (nec minùs perversè) huic acceptum referunt alii, quod virtute cæteris antecellant nonnulli, quod sivè domi, sivè militiæ principatû obtineant. Atquè cum tantum valeat temperies, nil mirum quod Ars Medica tot leges condiderit, tot signa tradiderit, quibus illa retegatur. A capite ad calcem hominem attentius intuetur, ut lassèquatur quâ sit temperie is donatus. Ex unguibus, ex pilis, ex reliquiis alimentorum argumenta petit, quibus præcellens qualitatum nodus enoderur. Nequè negem ab his notis certi quiddam concludi posse. At eo maximè se prodit temperamentum, quod fidem facit haud dubiam, quæ sit victrix in corpore qualitas; quod testatur quæ sit indoles molis sanguineæ, quæ causa functionum.

II.

QUI doctrinam atomorum profitentur, minùs illi de temperie solliciti sunt. Vix aliquam de ea movere quæstionem videntur, qui munia quæque naturalia ab istis principiis proficisci putant, non autem ab elementis. Facile etenim intelligitur quantum temperies habeat ad benè medendum commodi & utilitatis. Sunt qui qualitati cuilibet bellum indicunt: atquè adeò temperiem substantiæ formæquè titulo donent. Sed ancillam cum dominâ præposterè confundunt, qui sic philosophantur. Concentum & harmoniam esse temperiem voluerunt quidam in republicâ medicâ spectatissimi. Multum illi quidem auribus blandiuntur hac sua dulcedine cantûs: sed rem ideò clariùs non exponunt. Sophistæ potiùs, quàm Medici quærent, an temperies quinta sit qualitas? Modò tibi persuasum sit albo qualitatum ascribendam esse temperiem, ne cures an secunda sit vel tertia. In hoc Medicinæ principes imitabere, qui primas quatuor qualitates ordinatè, cæteras confusè composuerunt. Sicut ex albo colore, cæruleo, vel alio quovis simul juncto unus aliquis prodit & emicat color: sic ex qualitatibus secum unâ confusis nascitur aliqua, cujus in corpore maximum est imperium. Paterno & materno semine permixto, eccè brevi temperies adest optata, quæ sicut ædificando corpori jam jam præest: sic eadem posthâc regendo, conservandoque primas tener. Ac licet qualitatum ferè cunctarum caduca, mutat ilis indoles: illa victrix perstat, ac superstite subjecto superstes ac propè immo,

ta manet. In morem vulpis, quæ pellem nusquam exuit, in morem plantarum quæ licet mutant solum, naturam vix mutant. Reginæ qualitatis hujus indolem maximè refert humor, quo vel alitur, vel alluitur corpus. Hinc cui temperies fervida contigit à naturâ, is bile tumet; nequè verò solum succi in corpore contenti motum, & impetum habent à temperie, quælibet ab eâ facultas excitatur ad actum; undè tam in naturalibus quàm in animalibus functionibus diversitas. A temperie quippè alii ad venerem segnes, alii citi, alii stolidi & hebetes frugibus consumendis nascuntur; alii mentis acie pollent, sublimiora quæquè animo versant, urbi & orbi dant jura.

III.

SOMNUS & vigilia variæ sunt affectiones singulorum animalium. Ità quippè divisa fuerunt vitæ pensæ, ut animalibus mox vigilandum, mox dormiendum sit. Hæc diversa affectio, diversè se prodit. Tempore vigiliæ graditur animal, quæ sunt ad vitam sustentandam alimenta necessaria perquirat, quibus posthæc urgente fame pascatur; tecta construit, quibus solem & imbres arceat, proli dat operam seu genitæ, seu mox generandæ. Dum vigilat homo, totus movetur; totus, ut sic dicam, in fermento est. At dum irrepserit somnus, pronum jacet animal, quietum est; clauduntur oculi, clauduntur ferè ostia cætera, quibus aditus est ad animæ regiam. At dùm carniū moles, dùm externæ partes quiete potiuntur; Naturæ vis omnis quæ tota penetralibus corporum abdicitur, minus otiiatur. Illa cibos perfectiùs coquit tunc temporis, sanguinem præparat, spiritus conficit, divitias accumulat, quibus illata damna à vigiliâ resarciat, ac par sit impensis vigiliæ propè futuræ sustinendis. Hac arte mirabili, hæc motus & quietis vicissitudine, hac accepti & expensi ratione corpus quodque animalium viget, conservatur: sicut regna mox bello, mox pace florent: sicut mercium reciproca advectione & transvectione urbes locupletantur. Dùm somno indulget homo, licet externi sensus feriantur, mens aut anima tota non feriat. Plures ideæ rerum per sensus ad cerebrum deportatæ sunt tempore vigiliæ, quæ vel in cerebro altius insculptæ, vel aliquâ sui saltem in hac parte molli vestigia reliquerunt.

Nequè verò substantia solùm cerebri, sed ipsi nonnumquàm spiritus & humores consignantur his speciebus rerum. Hæ porrò species per somnum vim imaginantem inordinate movent. Hinc perturbatæ cogitationes sæpe numero, quæ nobis insomnia sunt. His & similibus insomniis animalia non minùs, quàm homines vulgò sollicitantur. Hinc toties audit canes allatrantes, cùm in utramque aurem dormirent. Pueris sicut fæminis visa talia dormientibus obijciuntur multò sæpiùs, quàm viris. Hinc vociferantur, ululant, rident pueri fœminæque his oris quibus arctè graviterque somnum capiunt. Eadem est in somnis vulgò species eorum, quæ vigilantes vidimus. Attamen aliquandò animus exspatiatur, incidit in visa pulchra, difformia, ad metum, ad horrorem, ad hilaritatem composita, quæ nec vigilans gessit, aut cogitavit usquàm: Et ex eorum apprehensione mirabiles existunt somniorum species. Ex quibuslibet somniis quiddam conjici posse plures opinantur; unde tot conjectores somniorum. Apud oratorem Chrysippus quidam somniorum vaferrimus interpretes audit. Hic *μάνθῆς χρεὼν* ab Homero, ab Hippocrate *διονείσις* tantum, ab aliis *χευότχολος* diceretur. Satis tibi sit si ex insomniis qualitatatum crasim æquius æstimare possis.

IV.

QUO tempore sensus arctis somni compedibus vincitur, si vinculis quibusdam, laxioribus certè cerebrum colligatur. Etenim accessione decessioneque sanguinis ac spirituum pars princeps diffunditur & constringitur semper in modum cordis; atquè cùm cerebri cortex, ejusque pori spirituum instabilium afluxu turgeant maximè his horis somni, cerebrum ab iis spiritibus variè movetur. Nec conquiescit reparatus & auctus sanguis in arteriis, nervos quibus arteriæ constant, quatit, & indè pleræque cerebri fibræ huc illuc aguntur. Hi motus varii perveniunt ad animam, hanc excitant, undè cogitationes confusæ. Namquè ut specula sunt, quæ rerum imagines minores, majores, rectas, inversas propter varium partium ordinem situmquè, propter inæqualem superficiem suam reddunt: sic ex inconstantibus motibus sanguinis ac spirituum, & præter regulam patentibus aut oclusis foraminibus cerebri deducitur anima in errores somniorum. At licet mens tunc

5
hallucinetur, ut plurimum aliquid veri huic suæ fraudi permiscetur. Sicut conspiciuntur tabulatum ex omni parte oculis non illudit, dum objecta longè distantia, proxima facit: sicut microscopium non usquequaque mentitur quàm atomos mole donat corporeâ, magnitudine plurimum auget. Quas habent sanguis ac spiritus affectiones, has habent à temperie. Quâ de causâ melancholici sanguis crassus & fuscus dicitur, biliosi flavus ac tenuis, pituitosi fluidus & albus, sanguinei ruber & mediocris consistentiæ creditur. Spiritus ipse sanguis est, flos ejus ac pars subtilissima. Qualis ergo sanguis, talis spiritus. Nil itaque mirum quod sanguis aut spiritus his & aliis dotibus instructus, diversimode cerebrum & mentem impellat: sicut hanc sensationem calor, hanc frigus facit. Sicut aliâ ratione piper, aliâ cinnamomum linguam pungit. Sicut nigrum & album dissimili modo retinam afficiunt. Sic à sanguine melancholico vel pituitoso variæ motiones in cerebro & mente excitantur: Res est extra dubium posita, sigillum ceram hâc effigie vel his characteribus certo consignat. Effectus assimilatur causæ. Quæcumque sit itaque in somniis confusio, distinctius explicabitur ab iis, quæ sit cerebri διαθεσις, quæ sanguinis ac spirituum indoles. Quod si ex delirii specie, quæ sit natura febricitantis cognoscitur? Quid ni hæc eadem natura declaretur insomniis. Profecto per vigiliam facilè celat iram biliosus, non ita per somnum. Per somnum nil fidei, nil simulatè loquitur callidus & versutus melancholicus. Si quod sæpè fit ambulat, minimè personatus ambulat. Quin ipse suam tunc evidentius patefaciet socordiam pituitosus; quàm tardo sit & hebeti ingenio non obscurè significabit. Socianda verba lyre fortè fortunâ proferet sanguineus; & ita ostendet quot ipse habeat ad voluptatem incitamenta. Naturam dicas nusquam melius in lucem educi quàm absente luce.

V.

NIL temerè, nil indoctè fit à naturâ, ipsis insomniis docemur. Ut hominem maximè cognitum & perspectum habeas, non tam diligenter attende, quo sit ille colore cutis, quibus ornatus pilis, quas lineas seu manu, seu fronte gerat insculptas. Sciscitare ab eo, dùm expergiscitur, quæ sibi rerum imago occurrat obdormenti, fida hæc erit naturæ interpres. In quiete puella videbitur egregiâ specie juveni *εὐσάρκῃ πολυ-*

ἄρσφα. Faces ardentes, corpora mille data letho, jurgia, lites cum aliquis somniabit, ex eo veracia bilis congestæ furentisque indicia fumes. Somnia plena terroris, & timoris atra caligo offundens oculos, mutilatorum corporum ideæ, nonnè temperiei melancholicæ testimonia sunt inexpugnabilia? Eluviones, trajectiones fluminum, naufragia si cui dormienti obijciantur, an titubanter affirmabis, hunc esse naturâ pituitosum? Hæc igitur signa præ fastu moroso ne rejicias: ne jactanter dicas hæc à mulierculis, stolidæ plebe inquirenda potius quàm à Philosophis vel Medicis. Illa minùs neglexit Galenus, cujus in verba juras. Cùm aliquis æger Principi Medico retulisset se totâ nocte sibi visum fuisse turpi cœno infixum & infectum: protinùs expurgandum esse hunc ægrotantem inde Galenus illicò judicavit. Vis addam plura, sed quæ novitate suâ minùs insolentia sint, quæ ad portentorum miracula non accedant, quæ fidem humanam nullatenùs superent. Vix assequebatur Galenus, quis humor ægritudinis esset parens ac fomes in ægrotante; quod subobscurum erat, in somniis patefactum fuit. Ager in quiete visus est aquis immergi. Somnium interpretatus Galenus hydragogis vacuandum hunc hominem asseruit. Pro votis res successit. Expeditâ alvoferosi recrementis, convaluit æger. Quod si somniis probatur, quid utile, quid amicum sit ægrotantibus, nec non & ostenditur via, quæ sit ad salutem securior ac certior, quidni & iisdem temperamenti cognitionem assequamur.

Ergo ex insomniis temperamenti cognitio.

Domini Doctores disputaturi.

M. Claudius Puyton, Decanus.

M. Claudius Berger.

M. Claudius Bicdisant.

M. Claudius Guerin.

M. Dominicus de Farey, rei

Herbaria Professor.

M. Henricus Mahieu.

M. Claudius Guerin.

M. Claudius Germain.

M. Germanus Freaux.

Proponebat Parisiis FRANCISCUS GOUËL, Parisinus
Baccalaureus Medicus. A. R. S. H. 1685.

PARISIIS,

Apud Franciscum Muguet, Regis & Facultatis Medicinæ
Typographum.